

**AVTOKREDIT" SUG'URTA MAHSULOTI DOIRASIDA AVTOTRANSPORT VOSITASI  
VA/YOKI MAXSUS TEXNIKALARNI KOMPLEKS SUG'URTA QILISH BO'YICHA  
BOSH KELISHUV SHARTNOMASI № 0100/874/1/2501448**

(Umumiy sug'urta sohasining 3,8,9 va 14-klasslari doirasida ishlab chiqilgan)

Toshkent sh.

“31” iyul 2025 yil

O'zbekiston Respublikasi Moliya vazirligi huzuridagi Sug'urta bozorini rivojlantirish agentligi tomonidan 2022-yil “22”-noyabrda 049696-sonli (SF-00010) litsenziyasi asosida faoliyat yurituvchi **“Kapital Sug'urta” AJ** (keyingi o'rinlarda – **Sug'urtalovchi**) nomidan ustav asosida harakat qiluvchi Bosh direktor **X.A.Bo'rixo'jaev** bir tomondan hamda bundan keyingi matnlarda **“Sug'urta qildiruvchi/Naf oluvchi”** deb yuritiluvchi **“Biznesni rivojlantirish banki” ATB** nomidan 2025-yil 17-iyuldagi 49-sonli Ishonchnoma asosida harakat qiluvchi bank Kredit bosh direktori **B.K.Mullajanov** ikkinchi tomondan, birgalikda “Tomonlar” va alohida “Tomon” deb yuritiluvchilar, mazkur kreditning qaytmaslik xatarini sug'urtalash bo'yicha Bosh sug'urta shartnomasi (keyingi o'rinlarda – sug'urta shartnomasi)ni quyidagilar haqida tuzdilar.

### I. SHARTNOMA PREDMETI

**1.1.** Mazkur “Avtokredit” sug'urta mahsuloti doirasida avtotransport vositasi va/yoki maxsus texnikalarni kompleks sug'urta qilish bo'yicha Bosh kelishuv shartnomasi (bundan keyingi matnlarda – “sug'urta shartnomasi”) O'zbekiston Respublikasining amaldagi qonunchilik normalariga asosan **“Kapital Sug'urta” AJ** (bundan keyingi matnlarda – “Sug'urtalovchi”) tomonidan ishlab chiqilgan va “Biznesni rivojlantirish banki” ATB bilan kelishilgan bo'lib, kredit hisobiga sotib olinayotgan avtotransport vositasi va/yoki maxsus texnikalar uchun ajratiladigan kreditlarning qaytmaslik xatarini hamda mazkur avtotransport vositasi va/yoki maxsus texnikalar Qarzdor (Qarz oluvchi) tomonidan kreditning ta'minoti sifatida garovga qo'yilgandan so'ng sug'urta qilish tartibi va shartlarini belgilaydi.

**1.2.** Sug'urta mukofoti mazkur sug'urta shartnomasida ko'rsatilgan miqdorda va muddatlarda to'lanishi sharti bilan Sug'urtalovchi ushbu sug'urta shartnomasi va uning ajralmas qismi bo'lgan 1-ilovada keltirilgan shartlarga muvofiq, sug'urta hodisasi sodir bo'lganda, Naf oluvchi yoki Qarz oluvchiga sug'urta polisida kelishilgan sug'urta summasi doirasida sug'urta qoplamasini to'lab berish majburiyatini oladi.

**1.3.** Sug'urtalovchi tomonidan mazkur sug'urta shartnomasi asosan Naf oluvchi va/yoki Qarz oluvchiga umumiy sug'urta sohasining 3, 8, 9 va 14-klasslari doirasida sug'urta himoyasi taqdim etiladi.

**1.4.** Mazkur sug'urta shartnomasining **3.1**-bandi bo'yicha “Biznesni rivojlantirish banki” ATB – Sug'urta qildiruvchi va **3.2**-bandi bo'yicha esa Qarzdor – Sug'urta qildiruvchi deb e'tirof etiladi.

**1.5.** Mazkur sug'urta shartnomasi bo'yicha “Biznesni rivojlantirish banki” ATB – Naf oluvchi hisoblanadi.

### II. UMUMIY ATAMALAR

**Sug'urtalovchi** – umumiy sug'urta sohasining tegishli klasslari bo'yicha sug'urtani amalga oshirish uchun litsenziyaga ega bo'lgan va mazkur sug'urta shartnomasiga muvofiq sug'urta to'lovi to'lovini amalga oshirish majburiyatini oluvchi tijorat tashkiloti va uning nomidan faoliyat yurituvchi filiallari.

**Sug'urta qildiruvchi** – Sug'urtalovchi bilan aniq sug'urta munosabatlariga kiruvchi, o'zining mulkiy manfaatlarini sug'urtalayotgan shaxs bo'lib, mazkur sug'urta shartnomasining 3.1-band bo'yicha “Biznesni rivojlantirish banki” ATB va 3.2-band bo'yicha esa Qarzdor – Sug'urta qildiruvchi deb e'tirof etiladi.

**Naf oluvchi** – mazkur sug'urta shartnomasiga ko'ra sug'urta qoplamasini olish huquqiga ega bo'lgan yuridik shaxs – **“Biznesni rivojlantirish banki” ATB** va uning nomidan faoliyat yurituvchi filiallari (*bank xizmatlari ofisi va markazlari*)..

**Qarz oluvchi (Qarzdor)** – Naf oluvchi bilan kredit shartnomasini tuzgan va mazkur sug'urta shartnomasiga qo'shilgan (ariza-so'rovnoman imzolash yoki ommaviy ofertani akseptlash), sug'urta shartnomasida kelishilgan sug'urta mukofotini to'lovchi shaxs (Naf oluvchining mijozlari).

**Kredit shartnomasi** – Naf oluvchi va Qarz oluvchi o'rtasida tuzilgan bitim bo'lib, uning asosida Naf

oluvchi Qarz oluvchiga pul mablag'larini kelishilgan miqdorlarda qaytarilishi, foizlilik va muddatlilik shartlarida taqdim etish, Qarz oluvchi esa olingan pul mablag'larini to'liq qaytarish va u bo'yicha foizlarni to'lash majburiyatini oladi.

**Ariza-so'rovnoma** – Qarz oluvchi tomonidan Sug'urtalovchiga integrallashtirilgan tizim orqali va/yoki mazkur sug'urta shartnomasining 1-ilovasiga muvofiq qog'oz shaklda to'ldirilgan holda taqdim etiladigan sug'urta obyekti to'g'risidagi ma'lumot. Ariza-so'rovnoma keltirilgan ma'lumotlarning to'g'riligiga Qarz oluvchi javobgar hisoblanadi.

**Ommaviy oferta** – sug'urta shartnomasining barcha asosiy shartlarini o'z ichiga olgan, javob qaytargan har qanday shaxs bilan ushbu taklifda ko'rsatilgan shartlar asosida shartnoma tuzishga bo'lgan xohish-irodasi haqidagi Sug'urtalovchining taklifi bo'lib, Ommaviy oferta mazkur sug'urta shartnomasiga muvofiq Sug'urtalovchi tomonidan integrallashtirilgan dasturlar orqali Qarz oluvchiga yuboriladi.

**Sug'urta polisi** – Sug'urtalovchi tomonidan sug'urta mukofoti to'langandan keyin mazkur sug'urta shartnomasiga muvofiq beriladigan va sug'urta shartnomasi (ommaviy oferta) tuzilganligini hamda Sug'urtalovchining sug'urta tovonini to'lash bo'yicha majburiyatlari kuchga kirganligini tasdiqlovchi hujjat.

**Sug'urta summasi** – sug'urta polisi, ariza-so'rovnoma va/yoki ommaviy ofertada ko'rsatilgan pul mablag'lari miqdori bo'lib, Sug'urtalovchi uning chegarasida ushbu sug'urta shartnomasiga muvofiq sug'urta qoplamasini Naf oluvchi va/yoki Qarz oluvchiga to'laydi.

**Sug'urta hodisasi** – sug'urta polisida ko'rsatilgan sug'urta muddati mobaynida haqiqatdan sodir bo'lgan voqea bo'lib, uning sodir bo'lishi bilan Sug'urtalovchida sug'urta qoplamasini to'lash majburiyati yuzaga keladi.

**Sug'urta qoplamasi (tovoni)** – Sug'urtalovchining Naf oluvchi va/yoki Qarz oluvchiga sug'urta hodisasi ro'y berishi oqibatida yetkazilgan zararni sug'urta summasi doirasida qoplab beriladigan pul mablag'lari.

**Sug'urta mukofoti** – mazkur sug'urta shartnomasida belgilangan tartib va muddatlarda to'lanishi shart bo'lgan sug'urta uchun to'lov. Sug'urta mukofoti Qarz oluvchi va/yoki qonunchilikda ta'qiqlanmagan shaxslar tomonidan to'lanadi.

**Sug'urta muddati** – sug'urta polisida ko'rsatilgan davr bo'lib, uning mobaynida sodir bo'lgan sug'urta hodisalari bo'yicha Sug'urtalovchining sug'urta qoplamasini to'lash majburiyatlari amalda bo'ladi.

**Avtotransport vositasi** – kredit mablag'lari hisobiga sotib olingan va yo'lovchilar, bagaj, yuklar tashishga hamda maxsus ishlarni bajarishga mo'ljallangan avtomobillar, shatakchi avtomobillar, tirkama va yarim tirkamalar bo'lib, ushbu sug'urta shartnomasining 1-ilovasida ko'rsatilgan avtotransport vositasi (keyingi matnlarda "transport vositasi" yoki "TV").

**Maxsus texnika** – kredit mablag'lari hisobiga sotib olingan va turli maxsus, afzal ravishda notransport ishlarni bajarish uchun mo'ljallangan maxsus texnikalar: qurilish texnikasi (ekskavatorlar, buldozerlar, g'altakli mashinalar, asfalt yotqazuvchilar, yuk ortuvchilar, beton qorishtirgichlar, betonnasoslar va boshqalar); qazib olish sanoatida foydalaniladigan maxsus texnika (qoziq qoquvchi, burg'ulash qurilmalari va boshqalar); o'rmon va qishloq xo'jaligi texnikalari (kombaynlar, traktorlar, yog'och sudrovchilar, seyalkalar, yog'och tashuvchilar va boshqalar) hamda qonunchilikka muvofiq maxsus texnikalar turkumiga kiruvchi boshqa har qanday maxsus texnikalar bo'lib, ushbu sug'urta shartnomasining 1-ilovasida ko'rsatilgan maxsus texnika (keyingi matnlarda "MT").

**Haydovchi** – Sug'urtalangan TV/MTni boshqarishga ruxsat beradigan toifali haydovchilik guvohnomasiga va O'zbekiston Respublikasining amaldagi qonun hujjatlariga muvofiq sug'urtalangan TV/MT boshqarish ruxsatnomasiga (ishonchnoma, yo'l varag'i va boshqalarga) ega bo'lgan shaxslar.

**Uchinchi shaxslar** – Qarz oluvchi va Haydovchidan boshqa har qanday shaxslar.

**Geografik hudud (sug'urta joyi)** – Sug'urta polisi amalda bo'ladigan hudud. Mazkur sug'urta shartnomasi bo'yicha, agar boshqa shartlar kelishilmagan bo'lsa, geografik hudud bo'lib O'zbekiston Respublikasi hisoblanadi.

**Sug'urta qiymati** – Sug'urta shartnomasini tuzish paytida tomonlarning kelishuviga ko'ra aniqlanadigan, sug'urta manfaati bilan bog'lanadigan TV/MTning qiymati.

### III. SUG'URTA HODISALARI

**3.1.** Sug'urta shartnomasining mazkur bandi bo'yicha sug'urta hodisasi bo'lib, sug'urta muddatida yuzaga kelgan, Qarz oluvchining kredit shartnomasi bo'yicha zimmasiga olgan majburiyatlarini quyidagilar natijasida bajarmaganligi yoki lozim darajada bajarmaganligi, ya'ni kredit to'lovlarini (asosiy qarz va hisoblangan foizlar, shu jumladan muddatidan oldin undirish belgilangan qarzdorliklar) belgilangan shartlarda va muddatlarda to'lanmaganligi hisoblanadi:

a) Kredit to'lovlarini to'lov grafigi bo'yicha 60 kundan ortiq vaqtda to'lanmaganligi (**birinchi sug'urta hodisasi**);

b) Kredit to'lovlarini to'lov grafigi bo'yicha jami 150 kun (birinchi sug'urta hodisasi – 60 kunga qo'shimcha 90 kun)dan ortiq vaqtda to'lanmaganligi (**ikkinchi sug'urta hodisasi**).

**3.2.** Sug'urta shartnomasining mazkur bandi bo'yicha TV/MTning quyidagi hodisalar natijasida shikastlanishi yoki yo'qotilishi sug'urta hodisasi hisoblanadi:

a) Yo'l-transport hodisalari;

b) Uchinchi shaxslarning noqonuniy hatti harakati;

c) O'g'rilik, TV/MTni noqonuniy egallab olish, olib qochish;

d) Boshqa jismlarning uchib kelib urilishi/tushishi oqibatida zarar yetishi;

e) Yong'in, portlash, suv toshishi, to'fon, bo'ron, sel, chaqmoq, do'l urishi, yer cho'kishi, yer qimirlashi, yemirilishi natijasida TV/MTga zarar yetishi.

**3.3.** Sug'urtalovchining mazkur sug'urta shartnomasi **3.1**-bandi bo'yicha sug'urta qoplamasini to'lash bilan bog'liq majburiyati sug'urta polisida ko'rsatilgan sanadan boshlanadi hamda Qarz oluvchi tomonidan kredit mablag'lari hisobiga sotib olinayotgan TV/MT mazkur kreditning ta'minoti uchun garovga qo'yilgan vaqtda tugaydi.

**3.4.** Sug'urtalovchining mazkur shartnomasi **3.2**-bandi bo'yicha sug'urta qoplamasini to'lash bilan bog'liq majburiyati Qarz oluvchi tomonidan kredit mablag'lari hisobiga sotib olinayotgan TV/MT mazkur kreditning ta'minoti uchun garovga qo'yilgan sanadan boshlab kuchga kiradi.

### IV. ISTISNOLAR

**4.1.** Sug'urtalovchi quyidagilar natijasida ko'rilgan yoki yuzaga kelgan zararlar uchun majburiyatlarni o'z zimmasiga olmaydi:

a) Agar Qarz oluvchining taqdim etgan ma'lumotlariga ko'ra, Sug'urtalovchi mazkur sug'urta shartnomasi doirasida sug'urta polisini tuzish uchun qaror chiqargan paytdan keyin va sug'urta polisi kuchga kirgandan so'ng, Qarz oluvchining sug'urta polisi rasmiylashtirish uchun noto'g'ri ma'lumotlar taqdim etganligi aniqlansa va bu holat sug'urta hodisasini keltirib chiqarishga asos bo'lgan bo'lsa;

b) Sug'urtalovchiga xabar qilmasdan sug'urta polisining amal qilishi davrida, kreditning oxirgi muddatini o'zgartirilishi;

c) Agar Sug'urtalovchiga sodir bo'lgan sug'urta hodisasi haqida amaldagi qonunchilikka ko'ra da'vo qilish muddatlarida xabar berilmagan taqdirda.

**4.2.** Quyidagi hodisalar natijasida TV/MTning zararlanishi sug'urta hodisasi hisoblanmaydi (sug'urta qoplamasini to'lash rad etiladi):

a) Qarz oluvchining, haydovchining yoki ularning vakillarining sug'urta hodisasi sodir bo'lishiga qaratilgan qasddan qilgan harakatlari, fuqarolik burchini ado etish yoki hayot, sog'liq va sha'nini himoya qilish harakatlari bundan mustasno;

b) TV/MTni boshqarayotganda man etilgan moddalarni iste'mol qilgan, har qanday turdagi mastlik holatida bo'lgan yoki reaksiya va diqqatni susaytiruvchi dori-darmonlar ta'siri ostida bo'lgan haydovchini TV/MTni boshqarishi, shuningdek, agar TV/MT haydovchisi YTH joyidan qochsa yoki tibbiy ko'rikdan (tekshiruvdan) o'tishdan bosh tortsa;

c) TV/MTni O'zbekiston Respublikasining qonun hujjatlariga muvofiq, boshqarish huquqiga ega bo'lmagan shaxs boshqarsa;

d) TV/MTdan uni boshqarishga o'rgatish yoki musobaqa yoki sinovlarda qatnashish maqsadlarida foydalanish;

e) TV/MT tashqi omillar ta'sirisiz ichki buzilishlar natijasida zararlanishi hamda foydalanishda doimiy ta'sir etuvchi omillar (tabiiy eskirish, yemirilish, zanglash), TV/MTning sekin-asta shikastlanishi;

f) TV/MT detallari (bog'lamalari, agregatlar, shinalar)ning eskirishi;

- g) Sug'urtalovchiga zararlangan predmetlarni yoki ularning qoldiqlarini taqdim etishdan bosh tortilsa, TV/MT o'zlashtirilgan yoki qoldiqsiz butunlay nobud bo'lishi bundan mustasno;
- h) Sug'urta polisi kuchga kirishi sanasidan avval har qanday boshqa sodir bo'lgan hodisa;
- i) TV/MT davlat idoralari topshirig'iga binoan olib qo'yilsa, musodara, rekvizitsiya qilinsa, hisbga olinsa yoki yo'q qilinsa;
- j) Zarar uchinchi shaxs tomonidan to'liq qoplangan;
- k) Sug'urtalovchiga ko'rilgan zarar haqida mazkur sug'urta shartnomasida belgilangan muddatlarda xabar bermaganligi oqibatida zararni keltirib chiqargan sabab va zarar miqdorini aniqlashning imkoni bo'lmasa.

## **V. SUG'URTA SUMMASI VA JAVOBGARLIK CHEGARASI**

**5.1.** Mazkur sug'urta shartnomasi bo'yicha sug'urta summasi – Qarz oluvchi va Naf oluvchi o'rtasida tuzilgan kredit shartnomasiga asosan ajratiladigan kreditning **125** foizidan kam bo'lmasligi lozim.

**5.2.** Sug'urta summasi har bir kredit shartnomasi bo'yicha alohida belgilanib, sug'urta polisida ko'rsatib o'tiladi va Sug'urtalovchi mazkur sug'urta summasi doirasida sug'urta qoplamasini to'lash majburiyatini oladi.

## **VI. SUG'URTA MUKOFOTINI HISOBLASH VA TO'LASH TARTIBI**

**6.1.** Sug'urta mukofoti kredit shartnomasining muddati va sug'urta summasidan kelib chiqib, quyidagicha belgilanadi:

- a) Transport vositasi bo'yicha har bir yil uchun yillik **0,6** foiz;
- b) Maxsus texnika bo'yicha har bir yil uchun yillik **0,3** foiz.

**6.2.** Sug'urta mukofoti Qarz oluvchi tomonidan sug'urta shartnomasiga qo'shilish bo'yicha ariza-so'rovnomaga imzolangan yoki ommaviy oferta tasdiqlangan kundan boshlab 3 (uch) ish kuni ichida kredit shartnomasining muddatiga mos ravishda to'liq to'lanadi.

**6.3.** Qarz oluvchi tomonidan sug'urta mukofoti to'lanishi mazkur sug'urta shartnomasi (sug'urta polisi) shartlariga to'liq va so'zsiz qo'shilganligini (akseptlaganini) bildiradi.

**6.4.** Sug'urtalovchi to'langan sug'urta mukofotini Qarz oluvchining yozma arizasiga ko'ra, Naf oluvchining roziligi bilan (xat yoki onlayn tartibda yuborilgan API so'roviga asosan) 15 (o'n besh) ish kuni ichida quyidagi tartibda Qarz oluvchiga qaytarib beradi:

- Kredit shartnomasi bo'yicha kredit mablag'lari ajratilmasa to'langan sug'urta mukofoti to'liq qaytariladi;

- Qarz oluvchi tomonidan kredit shartnomasi bo'yicha ajratilgan kredit mablag'lari muddatidan avval so'ndirilganda, sug'urta mukofotining mazkur so'ndirilgan muddatgacha (yozma murojat qilingan kungacha) tegishli qismini chegirib tashlagan holda qaytariladi.

## **VII. SUG'URTA POLISINI BERISH TARTIBI**

**7.1.** Sug'urta polisi mazkur sug'urta shartnomasi doirasida har bir Qarz oluvchi bo'yicha anketa-so'rovnomaga imzolangan va/yoki ommaviy oferta akseptlangandan so'ng, individual ko'rinishda rasmiylashtiriladi.

**7.2.** Sug'urta polisi mazkur sug'urta shartnomasi (ommaviy oferta)da belgilangan tartibda va muddatda Sug'urtalovchining bankdagi hisobraqamiga sug'urta mukofoti (pul mablag'lari) kelib tushgandan  
so'ng  
1 (bir) ish kuni ichida taqdim etiladi.

**7.3.** Sug'urta polisi (E-polis) Sug'urtalovchining rasmiy veb-sayti, ilovalari va avtomatlashtirilgan axborot tizimlari orqali elektron ravishda taqdim etiladi.

**7.4.** Mazkur sug'urta shartnomasining amal qilish davrida Sug'urtalovchining sug'urta xizmatini ko'rsatish darajasi Naf oluvchining ichki me'yoriy hujjatlarida ko'rsatilgan talablarga muvofiq kelmasa, Naf oluvchi yangi polis qabul qilishni bir tomonlama to'xtatishga haqli.

**7.5.** Qarz oluvchi tomonidan ariza-so'rovnomaga imzolangan yoki ommaviy oferta akseptlangan kundan boshlab mazkur sug'urta shartnomasiga qo'shilgan hisoblanadi va sug'urta shartnomasining  
ya'ni

3.1-bandi bo'yicha – "Qarzdor", 3.2-bandi bo'yicha esa – "Sug'urta qildiruvchi" sifatida ishtirok etadi.

**7.6.** Qarz oluvchi tomonidan ommaviy ofertani akseptlash quyidagilar hisoblanadi:

- Sug'urta shartnomasi shartlarini boricha va to'liqligicha qabul qilish;

- Mazkur sug'urta shartnomasining 6.1.- 6.2. bandlariga muvofiq sug'urta mukofotini to'lash;

Ommaviy oferta va uning shartlari Fuqarolik kodeksining 367-, 369-, 370-moddalariga asosan ishlab chiqilgan.

## **VIII. SUG'URTA SHARTNOMASINING KUCHGA KIRISHI VA UNING AMAL QILISH MUDDATI. SUG'URTA SHARTNOMASINI TUGATISH VA BEKOR QILISH TARTIBI**

8.1. Mazkur sug'urta shartnomasi tomonlar imzolangandan so'ng kuchga kiradi va tomonlar/taraflar o'z majburiyatlarini to'liq bajarilguniga qadar amalda bo'ladi.

8.2. Sug'urtalovchining sug'urta hodisasi sodir bo'lganda sug'urta qoplamasini to'lash majburiyati Sug'urtalovchiga sug'urta mukofoti to'langan sanadan boshlab kuchga kiradi.

8.3. Sug'urta shartnomasining amal qilishi quyidagi hollarda bir tomonlama to'xtatiladi:

a) amal qilish muddati tugaganda;

b) Sug'urtalovchi tomonidan mazkur sug'urta shartnomasi va Naf oluvchi bilan avval tuzilgan boshqa sug'urta shartnomalari bo'yicha Naf oluvchi oldidagi sug'urta tovonini to'lash bilan bog'liq majburiyatlari belgilangan muddatdan 1 (bir) oyga kechiktirilsa;

c) Sug'urtalovchi Qarz oluvchi va Naf oluvchi oldidagi majburiyatlarni to'liq bajarganda;

d) Qarz oluvchi tomonidan ariza-so'rovnoma imzonlangan va/yoki ommaviy oferta akseptlangandan so'ng sug'urta mukofoti Sug'urtalovchining bank hisobvarag'iga ushbu sug'urta shartnomasida kelishilgan to'lov sanasidan keyin 3 (uch) bank kuni ichida to'lanmasa;

e) O'zbekiston Respublikasining amaldagi qonun hujjatlarida nazarda tutilgan boshqa holatlarda.

## **IX. TOMONLARNING HUQUQ VA MAJBURIYATLARI**

### **9.1. Qarz oluvchining huquqlari:**

f) Sug'urta muddati mobaynida sug'urta masalalari bo'yicha Sug'urtalovchining maslahatlarini olishi;

g) Sug'urta hodisasi sodir bo'lganda Sug'urtalovchidan sug'urta qoplamasini olishi;

h) Sug'urta hodisasi sodir bo'lganda mustaqil tekshiruv o'tkazilishini talab qilishi;

i) TV/MTga o'rnatilgan qo'shimcha uskunalarni sug'urtalashi;

j) Qo'shimcha kelishuv tuzish yo'li bilan sug'urtalovchi bilan kelishgan holda sug'urta shartnomasiga o'zgarishlar va (yoki) qo'shimchalar kiritishi;

k) Sug'urtalovchi xabardor qilinishi sharti bilan shartnomani bekor qilishi;

l) Polis yo'qolgan taqdirda uning dublikatini olishi.

### **9.2. Naf oluvchining majburiyatlari:**

a) Sug'urta hodisasi sodir bo'lishining oldini olish uchun barcha choralarni ko'rishi va ajratilgan kredit mablag'larining maqsadli ishlatishini nazorat qilishi;

b) Kredit shartnomasi bo'yicha har qanday o'zgartirish va qo'shimchalar bo'yicha har qanday qarorni qabul qilishdan avval Sug'urtalovchining yozma roziligini olishi;

c) Sug'urtalovchining so'roviga ko'ra, sodir bo'lgan hodisani o'rganish uchun zarur bo'lgan barcha ma'lumotlarni va xujjatlarni taqdim etish;

d) Sug'urta mukofotini qoidada belgilangan miqdorda va tartiblarda to'lanishini ta'minlash;

e) Sug'urtalovchi tomonidan aybdor shaxslarga nisbatan talab qilish huquqining amalga oshirilishi uchun sug'urta hodisasiga oid barcha hujjatlarni berish va undirish bo'yicha lozim bo'lgan choralarni ko'rish.

### **9.3. Qarz oluvchining majburiyatlari:**

a) TV/MTni DYHX organlarida hisobdan chiqarilganda yoki qayta rasmiylashtirilganda, ro'yxatga olish-hisob hujjatlari, ro'yxatga olish (raqamli) belgilari almashtirilganda uch kunlik muddat ichida, qoida/polisga o'zgartirishlar kiritish uchun Sug'urtalovchiga yozma xabar qilish;

b) Zararni kamaytirish va sug'urtalangan obyektzni saqlab qolish uchun barcha amalga oshirilishi mumkin bo'lgan, shu jumladan Sug'urtalovchi tomonidan tavsiya etilgan choralarni ko'rish;

c) Sug'urta hodisasi ro'y bergandan so'ng, bu haqda zudlik bilan maxsus vakolatli organlarga ma'lum qilish va 5 (besh) ish kuni ichida har qanday maqbul yo'l bilan (telefon, faks orqali) Sug'urtalovchiga xabar berish;

d) Hodisa tafsilotlari va zarar miqdorini aniqlash uchun zarur bo'lgan boshqa hujjatlarni taqdim etish va tanishishga imkon yaratish;

e) Sug'urta qoplamasini olish talabi bilan murojaat qilganda Sug'urtalovchiga zarar sababi va miqdorini tasdiqlovchi barcha zarur hujjatlarni taqdim etishi shart

f) Sug'urtalovchi tomonidan aybdor shaxslarga nisbatan talab qilish huquqining amalga oshirilishi uchun sug'urta hodisasiga oid barcha hujjatlarni berish va undirish bo'yicha lozim bo'lgan choralarni ko'rish;

g) O'zbekiston Respublikasining amaldagi qonunchiligida nazarda tutilgan boshqa huquq va majburiyatlar.

#### **9.4. Sug'urtalovchining huquqlari:**

a) Qarz oluvchi tomonidan taqdim etilgan ma'lumotni va sug'urta obyektining berilgan tavsifga muvofiqligini, shuningdek, mazkur qoida shartlariga amal qilinishi (rioya qilinishi)ni nazorat qilish;

b) Sug'urtalangan obyektning holati (ahvoli)ni tekshirish (monitoring);

c) Mustaqil ravishda sug'urta hodisasi sabablari va shart-sharoitlarini aniqlash;

d) Qarzdor va/yoki Naf oluvchidan sug'urta hodisasi yuz berganlik faktini yoki to'lanishi lozim bo'lgan sug'urta qoplamasi miqdorini aniqlash uchun zarur bo'lgan axborotni olish;

e) Zarur bo'lganda, maxsus vakolatli organlarga sug'urta hodisasi yuz berganlik faktini va sabablarini tasdiqlovchi hujjatlarni va ma'lumotlarni taqdim etish haqida so'rovnomaga yuborish;

f) Sug'urta qoplamasini to'lashni sug'urta hodisasini keltirib chiqaruvchi barcha shart-sharoitlar oydinlashmagunga (jumladan, maxsus vakolatli organlarga yuborilgan rasmiy so'rovlarga yozma ravishda javob olmagunga) qadar kechiktirish;

g) Shikastlangan TV/MTni ta'mirlashdan oldin Sug'urtalovchiga ko'zdan kechirish uchun berilmaganda, shuningdek ushbu qoidada ko'zda tutilgan majburiyatlar bajarilmaganda sug'urta qoplamasini to'lab berishni rad etish;

h) Sug'urta hodisasi sodir bo'lganligi haqida xabar qilingan kundan boshlab "15 kalendar kuni" mobaynida zarur hujjatlar taqdim etilmaganda sug'urta da'vo ishini keyingi ish yurituvini to'xtatib turishi.

#### **9.5. Sug'urtalovchining majburiyatlari:**

a) Qarz oluvchini sug'urta shartlari bilan tanishtirishi;

b) Qarz oluvchiga sug'urta polisini sug'urta shartnomasida kelishilgan sug'urta mukofoti to'langandan keyin 1 (bir) ish kuni ichida polis taqdim etishi;

c) Sug'urta hodisasi sodir bo'lganda Qarz oluvchi va/yoki Naf oluvchiga ushbu sug'urta shartnomasi bilan belgilangan tartib va muddatda sug'urta qoplamasining to'lovini amalga oshirishi;

d) Qarz oluvchi va Naf oluvchini sug'urta qoplamasining to'lovi rad etilganligi to'g'risida O'zbekiston Respublikasi qonun hujjatlarida belgilangan muddatda yozma shaklda xabardor qilishi;

e) Sug'urta shartnomasi amalda bo'lgan davrda Qarz oluvchi va Naf oluvchidan olingan axborotning maxfiyligini ta'minlash, Sug'urtalovchi O'zbekiston Respublikasining amaldagi qonun hujjatlariga muvofiq davlat idoralariga axborot taqdim etishi shart bo'lgan holatlar yoki axborotni oshkor qilish uchun uning egasidan yozma ruxsat olingan holatlar bundan mustasno.

## **X. SUG'URTA SUMMASI (QOPLAMASI, TOVONI)NI TO'LASH TARTIBI**

**10.1.** Sug'urta tovonini Sug'urtalovchi tomonidan mazkur sug'urta shartnomasi **3.1**-bandining "a" kichik bandi (**birinchi sug'urta hodisasi**) bo'yicha kreditning muddati o'tgan asosiy qarzi va barcha foizlarini,

**3.1**-bandining "b" kichik bandi (**ikkinchi sug'urta hodisasi**) bo'yicha barcha kredit qarzdorligi (muddati o'tgan/o'tmagan asosiy qarzi va asosiy qarzga hisoblangan barcha foizlar)ni Naf oluvchi yoki Qarz oluvchiga (Naf oluvchining tanloviga ko'ra) sug'urta summasidan oshmagan miqdorda to'lab beriladi.

Bunda, Sug'urtalovchi tomonidan Qarz oluvchining kredit qarzdorligi qoplanishi bo'yicha undiruvni kredit shartnomasiga muvofiq ta'minot sifatida qabul qilingan garov sifatidagi mol-mulklarga, uchinchi shaxslar taqdim etgan kafillik va kafolatlariga qaratilgan yoki qaratmaganligidan qat'iy nazar Naf oluvchiga sug'urta tovonini to'lab beradi.

**10.2.** Sug'urta tovonini Sug'urtalovchi tomonidan mazkur sug'urta shartnomasining **3.2**-bandida ko'rsatib o'tilgan sug'urta hodisasi sodir bo'lganda, Naf oluvchi yoki Qarz oluvchiga (Naf oluvchining tanloviga ko'ra) quyidagi miqdorda to'lab beriladi:

- Sug'urtalangan TV/MT o'g'irlanganda yoki to'liq nobud bo'lganda – avval to'langan (to'langan bo'lsa) sug'urta qoplamalarini chegirgan holda sug'urta summasi doirasida.

- Sug'urtalangan TV/MT zararlanganda – baholash faoliyati bilan shug'ullanish sertifikatiga ega tashkilotning baholash dalolatnomasi asosida quyidagi formula bo'yicha hisoblanadi:

$$DH = (TX - SSY - QTX - MSQ) * SP / SQ * 100 + BX + KX + PZ$$

agar  $DH \geq SP$ , unda  $ST = SP$ , agar  $DH < SP$ , unda  $ST = DH$

bunda, DH – dastlabki hisob-kitob; TX – TV/MTni tiklash xarajatlari (kalkulyatsiya), shu jumladan ta'mirlovchi tashkilot xizmatlari uchun xarajatlar hamda ehtiyot qismlar va foydalanilgan materiallar qiymati; SSY – sifatni sekin-asta yo'qotilishi (eskirish); QTX – TV/MTni takomillashtirish xarajatlari, shuningdek TV/MT va uning qismlarining eskirishi va texnik nuqsoni sababli qayta ta'mirlash, ta'mirlash (almashtirish) bilan bog'liq xarajatlar; MSQ – agar TV/MTga yetkazilgan zarar uchun uchinchi shaxs javobgar bo'lsa, TV/MT egalariining fuqarolik javobgarligini majburiy sug'urtasi bo'yicha olingan qoplama; SP – TV/MTning sug'urta puli; SQ – TV/MTning sug'urta qiymati; BX – shikastlagan TV/MTning zararlarini baholash yoki ta'mirlash xarajatlariining hisob-kitobi; KX – 50 km chegarasida TV/MTni ko'chirish xarajatlari; PZ – TV/MTni foto va videosuratga olish xarajatlari; ST – sug'urta qoplamasi.

**10.3.** Sug'urta shartnomasining **3.1-bandida** ko'rsatib o'tilgan sug'urta hodisasi yuzaga kelganda, Naf oluvchi 10 (o'n) ish kuni ichida Sug'urtalovchiga sug'urta tovonini to'lab berishi bo'yicha elektron ravishda ariza (talabnoma) yuboradi.

Mazkur arizada Qarz oluvchi (-lar) va kredit qarzдорligi to'g'risidagi ma'lumotlar ko'rsatiladi va quyidagi hujjatlarning nusxasi ilova qilinadi:

- Anketa-ariza;
- Sug'urta polisi;
- Kredit shartnomasi va to'lov grafigi;
- Qarz oluvchi jismoniy shaxs bo'lganda – shaxsini tasdiqlovchi hujjat (Pasport, ID kartasi va boshqalar), tadbirkorlik subyekti (YATT va/yoki yuridik shaxs) bo'lganda – guvohnoma, rahbar va ta'sischilarning pasporti;
- Kredit qarzдорligini undirish yuzasidan ogohlantirish xatlari va to'lov kvitansiyasi (*mazkur hujjat faqatgina ikkinchi sug'urta hodisasi bo'yicha ilova qilinadi*).

Naf oluvchi tomonidan ariza (talabnoma)ga qo'shimcha ravishda Qarz oluvchiga tegishli bankda mavjud bo'lgan boshqa hujjatlar ham ilova qilinishi mumkin.

**10.4.** Sug'urta shartnomasining **3.2-bandida** ko'rsatib o'tilgan sug'urta hodisasi yuzaga kelganda, Qarz oluvchi bu haqda zudlik bilan maxsus vakolatli organlarga ma'lum qiladi va 5 (besh) ish kuni ichida har qanday maqbul yo'l bilan (telefon, faks orqali) Sug'urtalovchiga xabar beradi.

Qarz oluvchi sug'urta tovonini to'lab berilishi bo'yicha Sug'urtalovchiga ariza beradi va quyidagi hujjatlarni ilova qiladi:

- Sug'urta polisi;
- Baholovchi tashkilotning TV/MTga yetkazilgan zarar miqdori to'g'risidagi dalolatnomasi (hisoboti);
- Sug'urtalovchining vakillari tomonidan tuzilgan ko'zdan kechirish dalolatnomasi;
- vakolatli organlarning hujjatlari;
- Uchinchi shaxslar zarar o'rnini qoplaganligi to'g'risida ma'lumotnoma (bunday qoplama olingan taqdirda);
- Sug'urta hodisasiga tegishli bo'lgan boshqa hujjatlar (agar mavjud bo'lsa).

**10.5.** Naf oluvchi mazkur sug'urta shartnomasining 10.3-bandi bo'yicha tegishli hujjatlarni Sug'urtalovchiga taqdim qilgandan so'ng, Sug'urtalovchi tomonidan 10 (o'n) ish kuni ichida sug'urta hodisasi to'g'risidagi dalolatnoma tuziladi. Naf oluvchi va Sug'urtalovchining mas'ul xodimlari tomonidan sug'urta hodisasi to'g'risidagi dalolatnoma yozma/elektron ravishda imzolangandan so'ng, Sug'urtalovchi

1 (bir) ish kuni ichida Naf oluvchiga sug'urta tovonini (qoplamasi)ni to'lab beradi.

**10.6.** Qarz oluvchi mazkur sug'urta shartnomasining 10.2-bandi bo'yicha tegishli hujjatlarni Sug'urtalovchiga taqdim qilgandan so'ng, Sug'urtalovchi tomonidan 15 (o'n besh) ish kuni ichida sug'urta hodisasi to'g'risidagi dalolatnoma tuziladi va 1 (bir) ish kuni ichida Naf oluvchi yoki Qarz oluvchiga (Naf oluvchining tanloviga asosan) sug'urta tovonini (qoplamasi)ni to'lab beriladi.

**10.7.** Sug'urta qoplamasi to'langan so'ng TV/MT bo'yicha sug'urta puli to'langan sug'urta qoplamasi miqdoriga kamayadi. Mazkur qoldiq miqdorida Sug'urtalovchi keyinchalik hodisasi sodir bo'lganda javobgarlikni olib boradi.

**10.8.** Agar zarar uchinchi shaxslar tomonidan qoplansa, Sug'urtalovchi faqat sug'urta shartlariga muvofiq to'lanishi kerak bo'lgan mablag' bilan uchinchi shaxslardan olingan mablag' o'rtasidagi farqni to'laydi.

**10.9.** Sug'urtalovchi tomonidan sug'urta qoplamasi to'langandan so'ng, to'langan mablag' chegarasida zarar uchun javobgar shaxsdan talab qilish huquqi Sug'urta qildiruvchidan Sug'urtalovchiga o'tadi. Bu huquq qasddan zarar yetkazilgan hollardan boshqa holatlarda haydovchiga nisbatan qo'llanilmaydi.

**10.10.** Qarz oluvchi va/yoki Naf oluvchi Sug'urtalovchi unga o'tgan talab qilish huquqini amalga oshirishi uchun zarur bo'lgan bankdagi mavjud barcha hujjatlar va dalillarni Sug'urtalovchiga topshirishi shart.

## **XI. KORRUPSIYAGA QARSHI SHARTLAR**

**11.1.** Tomonlar ushbu sug'urta shartnomasi bo'yicha o'z majburiyatlarini bajarayotganda ularning har biri o'z faoliyatida korrupsion harakatlarni to'liq taqiqlash va har qanday shaklda yordam (bevosita yoki bilvosita), shu jumladan pul mablag'lari, qimmatbaho buyumlar, boshqa mol-mulk yoki mulkiy xarakterdagi xizmatlar, boshqa mulkiy huquqlarni olish/berish, muayyan masalalarni tezroq hal qilishni ta'minlash, ma'muriy va boshqa tartib-qoidalarini soddalashtirish, raqobat va boshqa afzalliklarni ta'minlashni to'liq rad etadi. Tomonlar o'z faoliyatida amaldagi qonunchilik, shuningdek uning asosida ishlab chiqilgan korrupsiyaga qarshi kurashishga qaratilgan siyosat va tartib (agar mavjud bo'lsa) talablariga amal qiladilar.

**11.2.** Tomonlar ushbu shartnoma bo'yicha o'z majburiyatlarini bajarish chog'ida na o'zlari, na ijroiya organi, na ularning mansabdor shaxslari yoki xodimlari biron-bir shaxslarga (jumladan, jismoniy shaxslar, tijorat tashkilotlari va davlat mansabdor shaxslari) korrupsion to'lovlarni taqdim etishni taklif qilmasligini, taqdim etmasligini, rozilik bermasligini, shuningdek har qanday shaxsdan (to'g'ridan-to'g'ri yoki bilvosita) har qanday korrupsion to'lovlarni olishga yoki qabul qilishga rozi bo'lmasliklarini kafolatlaydi.

**11.3.** Mazkur bo'limning biron bir shartlari buzilgan taqdirda, tegishli taraf boshqa tarafni bunday buzilish sodir bo'lgan kundan boshlab 5 (besh) ish kuni ichida yozma ravishda xabardor qilish majburiyatini oladi. Tomonlar yozma xabarnomada ushbu bo'limning qaysi bir qoidalari buzilganligini tasdiqlovchi ishonchli faktlar va materiallarni taqdim qilishi shart.

Yozma xabarnomalar "Biznesni rivojlantirish banki" ATB tomonidan tashkil etilgan jismoniy va yuridik shaxslar uchun korrupsiyaga qarshi kurashish "Komplayens ishonch liniyasi" kanallari (**tel: 78-150-59-95**, veb sayt **[www.brb.uz](http://www.brb.uz)**, Telegram messenger **@BRB\_ANTI KOR\_BOT** (email: **[antikor@brb.uz](mailto:antikor@brb.uz)**) orqali amalga oshiriladi.

**11.4.** Ushbu bo'lim shartlari tomonlarning biri buzilganligi bo'yicha fakti tasdiqlanganda va/yoki boshqa Tomonning qoidabuzarliklarni ko'rib chiqish haqida xabarnoma natijalari yuzasidan ma'lumot taqdim qilmagan taqdirda, boshqa taraf shartnomani bir taraflama qisman yoki to'liq bekor qilishga haqli.

**11.5.** Mazkur sug'urta shartnomasini korrupsiyaga qarshi shartlarga asoslanib bekor qilgan taraf, bunday bekor qilish natijasida yetkazilgan haqiqiy zararni talab qilishga haqli. Zararlarni qoplash tomonlarning mas'ul xodimlari tomonidan yozma ravishda tasdiqlangan dalolatnomada belgilangan muddat va miqdorda amalga oshiriladi.

## **XII. SUBROGATSIYA**

**12.1.** Sug'urtalovchi tomonidan sug'urta qoplamasi to'liq yoki qisman to'langanda, Sug'urtalovchiga ushbu summa doirasida Sug'urta qildiruvchiga yetkazilgan zarar uchun javobgar shaxsga nisbatan regress talabi huquqi o'tadi.

**12.2.** Naf oluvchi va/yoki Qarz oluvchi sug'urta hodisasi yuz berishiga aybdor shaxsga nisbatan da'vodan yoki unga qo'yilgan talablarni amalga oshiruvchi huquqdan voz kechsa, shuningdek, Sug'urtalovchiga regress talablarni amalga oshirish uchun zaruriy hujjatlarni berishdan bosh tortsa,

Sug'urtalovchi sug'urta qoplamasining ma'lum bir qismini to'lab berishdan ozod qilinadi va ortiqcha to'langan sug'urta qoplamasini qaytarib berilishini talab qilishga haqli.

### XIII. TOMONLARNING JAVOBGARLIGI

13.1. Tomonlar o'z zimmlariga qabul qilingan majburiyatlarni bajarmaganlik yoki lozim darajada bajarmaganlik uchun O'zbekiston Respublikasi qonun hujjatlariga muvofiq javobgardirlar.

13.2. Qarz oluvchi ushbu sug'urta shartnomasida ko'rsatilgan muddatlarda sug'urta mukofotini o'z vaqtida to'lash uchun javobgar.

### XIV. BAHSLARNI HAL ETISH TARTIBI


14.1. Ushbu sug'urta shartnomasidan kelib chiqadigan bahslar, kelishmovchiliklar yoki talablarni, shu jumladan uning ijrosi, buzilishi, to'xtalishi yoki haqiqiy emasligiga taalluqli masalalarni muzokaralar orqali hal etishning imkoni bo'lmasa, ular O'zbekiston Respublikasining amaldagi qonun hujjatlariga muvofiq hal etiladi.

### XV. BOSHQA SHARTLAR

15.1. Sug'urta shartnomasiga kiritilayotgan barcha qo'shimchalar va o'zgarishlar yozma shaklda amalga oshirilishi shart.

15.2. Tomonlarning ushbu sug'urta shartnomasida ko'rsatilmagan o'zaro munosabatlari O'zbekiston Respublikasining amaldagi qonun hujjatlari bilan tartibga solinadi.

### XVI. TOMONLARNING YURIDIK MANZILLARI VA REKVIZITLARI

|                                                                                                                                                                                                                                                                                                                                                                                                                                                                                           |                                                                                                                                                                                                                                                                                                                                                                                                                                                                                                                 |
|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p><b>“Sug'urtalovchi”</b><br/><b>“Kapital Sug'urta” AJ</b></p> <p><b>Manzil:</b> Toshkent shahar M.Ulug'bek tumani Maxatma Gandi ko'chasi, 44-uy.<br/><b>H/r:</b> 20216000300138037003<br/><b>“Biznesni rivojlantirish banki” ATB</b><br/><b>MFO:</b> 01037, <b>STIR:</b> 200638670,<br/><b>XTTUT:</b>65120 <b>Tel:</b> 71- 200-11-10</p> <p>Bosh direktor <b>X.A.Bo'rixo'jaev</b></p> <p>(imzo)</p>  | <p><b>“Sug'urta qildiruvchi/Naf oluvchi”</b><br/><b>“Biznesni rivojlantirish banki” ATB</b></p> <p><b>Manzil:</b> Toshkent shahar, A.Navoiy ko'chasi, 18-A uy.<br/><b>H/r:</b> 29896000400001037410<br/><b>“Biznesni rivojlantirish banki” ATB</b><br/><b>MFO:</b> 01037, <b>STIR:</b> 206 916 313,<br/><b>OKED:</b> 64190, <b>tel.:</b> 78-150-93-39</p> <p>Kredit bosh direktori <b>B.K.Mullajanov</b></p> <p>(imzo)</p>  |
|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|



“Kapital Sug‘urta” AJ va  
“Biznesni rivojlantirish banki” ATB o‘rtasida  
2025-yil \_\_\_\_\_ da tuzilgan  
Bosh kelishuv shartnomasiga  
1-ilova

“Kapital Sug‘urta” AJ  
Bosh direktori X.A.Bo‘rixo‘jaevga  
Qarz oluvchi  
\_\_\_\_\_ dan

### ARIZA-SO‘ROVNOMA

Ushbu Anketa-so‘rovnoma bilan, Sizdan quyidagi ma’lumotlar asosida sug‘urta shartnomasini/polisini tuzishingizni so‘rayman.

|      |                                                                                 |                                                                                                         |
|------|---------------------------------------------------------------------------------|---------------------------------------------------------------------------------------------------------|
| 1.   | <b>Qarz oluvchi:</b>                                                            |                                                                                                         |
| 2.   | <b>Qarz oluvchining manzili va boshqa ma’lumotlar:</b>                          | Manzili:<br>_____<br>Shaxsiy ma’lumotlar:<br>_____<br>Telefon raqami: _____                             |
| 3.   | <b>TV/MTni yetkazib berish bo‘yicha shartnoma:</b>                              | “ ____ ” _____ 20____ yildagi №- _____ sonli                                                            |
| 4.   | <b>Kredit shartnomasi:</b>                                                      | “ ____ ” _____ 20____ yildagi №- _____ sonli                                                            |
| 5.   | <b>Kredit muddati:</b>                                                          | “ ____ ” _____ 20____ yildan “ ____ ” _____ 20____ gacha                                                |
| 6.   | <b>Kredit miqdori:</b>                                                          | _____ ( _____ ) so‘m 00 tiyin                                                                           |
| 7.   | <b>Kredit qaytmasligi bo‘yicha sug‘urta summasi:</b>                            | _____ ( _____ ) so‘m 00 tiyin                                                                           |
| 8.   | <b>TV/MTga yetkazilgan mulkiy zararlar bo‘yicha sug‘urta summasi:</b>           | _____ ( _____ ) so‘m 00 tiyin<br>(TV/MTni bank tomonidan qabul qilinadigan qiymati miqdorida)           |
| 8.1. | <b>TV/MTning sug‘urta qiymati:</b>                                              | _____ ( _____ ) so‘m 00 tiyin                                                                           |
| 9.   | <b>Sug‘urta muddati:</b>                                                        | “ ____ ” _____ 20____ yildan “ ____ ” _____ 20____ gacha<br>(kredit shartnomasi muddati mos ravishda)   |
| 9.1. | <b>Jumladan, kredit qaytmasligi bo‘yicha sug‘urta muddati:</b>                  | “ ____ ” _____ 20____ yildan “ ____ ” _____ 20____ gacha                                                |
| 9.2. | <b>Jumladan, TV/MTga yetkazilgan mulkiy zararlar bo‘yicha sug‘urta muddati:</b> | “ ____ ” _____ 20____ yildan “ ____ ” _____ 20____ gacha<br>(kredit shartnomasi muddatiga mos ravishda) |

*Sug‘urta shartnomasi bilan tanishdim va nusxasini oldim.*

*Mazkur sug‘urta shartnomasining shartlariga roziman, ularni bajarish majburiyatini olaman hamda ushbu sug‘urta shartnomasi doirasida shartnomaviy munosabatga kirishaman. Shuningdek, taqdim etilayotgan ma’lumotlarning haqqoniyligini tasdiqlayman.*

**Berildi:**

**Qarz oluvchi nomidan:** \_\_\_\_\_ “ \_\_\_\_ ” \_\_\_\_\_ 20\_\_\_\_ yil.